

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 856 del 10/04/2025

Ver en jor 2025 va “Hoff ont pèrglòntschòft” va TSM-STEP Schual ver en lòntregiar ont ver de lòntschòft, fokus as “s innbende ont ausbende van hoff”

En Palai en Bersntol ist u’gaheift der workshop asn derhòltn de lòntumpau

Holz ont stoa’ sai’ de materialn as men praucht ver za paun de heff van pèrng: sai’ dinger as men vinnt asn lònt ont as de kemmen praucht en de haiser van pèrg ont as mòchen ònderst ausschaung de lòntschòft van Bersntol.

Van hoff, as ist zan mearestn gamòcht van doin materialn, klòfft men en de zbaite edizion 2025 van workshop “Heff ont aussicht va pèrg: s innbende ont s ausbende van hoff”, van TSM-STEP Schual ver za regiarn de eirter ont de aussicht, ver de technique as òrbetn, auskennetn lait, de hòntbèrker, òllgamoas’regiarer ont schualer van Enaip, pet de rif za vertiavern a toal dinger ver en aupaun ont ver de aussicht van heff, verpuntn en de òrbetn va ausrichtn van doin haiser innbende ont ausbende.

Ungefèr sèsk toalnemmer as mòchen toal va de vourtschbinn, men plaip a ker en omt ont a ker mòcht men a pasuach en ourt ont men lòk sechen abia as men tuat, en Bersntol, en Valzegu’ ont en Val Gardena. De vourstell van doi kurs ist kemmen gamòcht gester en de vria en de gamoa’sol va de Gamoa’ va Palai en Bersntol, pet de grias van innrichtn ont de pericht van iberòll viarer van Dipartiment urbanistik, strom, kataster, grunttisch ont lòntzòmmhòlt va de Autonome Provinz va Trea’t Giovanni Gardelli ont van vourstea’ner van TSM STEP Schual ver za regiarn en ourt ont de aussicht Gianluca Cepollaro.

Der projekt kimmp zuazolt van PNRR “De kròft va de minderhait: mòchen bider lem s taitsches dorf en sud van Alpn”, Hilf n. 29, projekt “Derhòltn de lòntumpau ont bèrt gem en de alpine lòntschòft, en lònt ont en de pèrgheff: sai’ guat za òrbetn pet de stoa’ ont pet en holz”, gamòcht va TSM-STEP, Schual ver en lòntregiar ont ver de lòntschòft zòmm pet de ENAIP, der Trentinische lòntschaug, der Stòttplòtz van Stelvio der Bersntoler Kulturinstitut, de Architekt PPC, de Engeniarn, de ackerpau dockter ont de forestaln dockter va de autonome provinz va Trea’t, CITRAC ont de Hòntbèrkvraischòft Confartigianato Trentin.

Der gònze programm as de sait:

<https://www.tsm.tn.it/attivita/masi-e-paesaggi-di-montagna-linterno-e-lintorno-del-maso/>

Ibersetz gamòcht van Sprochtirl va de Tolgamoia'schòft Hoa Valzegu' ont Bersntol
(cdt)